

Leidse charters stadsheerlijkheden en vroomwateren betreffende Zoeterwoude en Stompwijk.

bewerkt door
Anthonius van der Tuijn

Inventaris 0505-543 Regest 48 d.d. 12-11-1530.

Dit regest is flink beschadigd, aan de linker en rechter zijde zijn stukken afgescheurd.

Ick Ghijsbrecht van Zweeten amboechts heer ende schout inden amboecht van Zoeterwoude doe kondt ende kenlijck allen luijden dat voer mijn quam Wouter Meeusz. ende gheliede ende bekende voer hem ende voer zijn erven dat hij vercoft heeft Claes Dircxz. de rechte helft van vijer morghen lants bij den hoep sonder maet, ghelegghen ghemenghender voer ende ghemenghender aerde mijt Wouter Gherijtsz. ende Claes Gherijtsz. inden amboecht voersz. Ende heeft belegghen an die noert zijde Jan Clemment soen ende Wouter Gherijtsz. ende die zuijtzijde Pieter Claesz., streckende van den Broeckwech op tot an dat goetshuijs lant toe. Ende Wouter Meeusz. voersz. ghelovede voer hem ende zijn erven Claes Dircksz. ende zijn erven dat voersz. vrije te waren ende daer als recht is ende allen commer of te doen tot nu ter tijt toe als men vrije buijer lant ende eijghen erf schuldich is te waren inden voersz. amboecht. Ende Claes Dircksz. voersz. of zijn erven eenijch ghebreck hijnder moeijenisse of schade hadden ander (marijngghen) dat soude zij moghen verzijen ende verhalen an vijf morghen lants die Wouter Meeusz. (zeet) tot waerborch ghelegghen inden voersz. amboecht, belegghen an die noert zijde Cornelij Florijsz. mijt zijn bruijckweer ende de zuijtzijde Sijmonsz., streckende van Pieter Willemsz. lant af tot an den Ommendijck toe. Ende Wouter Meeusz. voersz. gheliede ende voor zijn erven hijer gheen weer van recht teghens te doen noch doen doen in een eenigher manieren gheestelijck ... waerlijck noch mijt ghene nuwen loesen vonden van recht die men hijer op teghens contrarie soude moghen dencken of versijeren soe belijede hem Wouter Meeusz. wel voldaan ende betaelt te wesen den laesten pennijck mijten eersten nijets wtbesondert. In een kennijessen der waerheijt soe hebbe ick Ghijsbrecht van Zweeten amboechtsheer ende scout desen brijef bezegghelt mijt mijn selfs zeegghel hijer onder an ghehanghen. Daer bij waren als jaer ons heeren vijftien hondert ende dertijch den twalefsten dach november.

Regest 50 d.d. 06-03-1533.

Ick Cornelis van Zweeten amboechts heer ende schout inden amboecht van Zoeterwoude doe kondt ende kenlijck allen luijden dat voer mij ende tuijghen hijer onder ghescreven selver persoonlijcken ghecomen is Claes Dirck Jansz. ende ghelije mijts desen voer hem ende zijn naecomelinghen dat hij vercoft heeft Cornelij Vrerijcksz. die rechte helft van vijer morghen lants bij den hoep sonder maet ghelegghen inden amboecht voersz., ghemenggheder voer ende ghemengghender aerden mijt Wouter Gherijtsz. ende Claes Gherijtsz. ende hebben belegghen wtwijzen desen brijefe daer desen brijef op doersteken is. Ende Claes Dircksz. voersz. ghelovede voer hem ende voer zijn erven dit voersz. lant Cornelij Vrerijcksz. vrije te waren als recht is ende allen commer of te doen tot nu ter tijt toe nae wt wijzen desen brijefe daer desen brijef op doersteecken is. Ende daer Cornelij Vrerijcksz. ende zijn erven meede te winnen, eijsschen ende verweeren, verweeren ende eijsschen in allen schijn ende ghelijcken of Claes dat selver waer, tot allen tijden. Ende Claes Dircksz. gheliede mijts desen voor hem ende zijn erven ende naecomelinghen van Cornelij Vrerijcksz. wel ende deuchdelijken van desen coop voldaan ende betaelt te wesen den laetsten penninck mijten eersten. Alle arghelist wt ghesondert in een kennijssen der waerheijt. Soe hebbe ick Cornelis van Zweeten amboechts heer ende schout inden voersz. amboechte desen brijef bezegghelt mijt mijn selfs zeegghel hijer onder anghelanghen. Daer bij waren als tuijghen Heijnrick Heijnricksz. ende Bruijn Gherijtsz. Int jaer ons heeren vijftijhen hondert ende drie ende dertijch den sesten dach in marcio.

Regest 51 d.d. 08-08-1535.

Ick Cornelis van Zweeten amboechts heer ende opper schout inden amboecht van Zoeterwoude doe kondt ende kenlick allen luijden dat voer mij huijden datum van desen brijefe voor mijn ende tuijghen hijer onder ghescreven selver persoonlijcke ghecomen zijn Claes Gherijtsz. ende Neeltgen, Wouter Gherijtsz. weduwe mijt Dirck Woutersz. hoer rechte voechts hant ende ghelijeden ende bekende mijts desen dat zij luijden mijt ghesamender hant vercoft hebben Cornelij Vrerijcksz. die rechte helft van drie morghen lants bijden hoep sonder maet, ghelegghen inden amboecht voersz. in Ghelderswoude. Ende heeft belegghen an die oestzijde Frans Aerntsz. ende die erfghenamen van Wouter Gherijtsz. ende die west zijde Pieter Claes, streckende vjerkant van dat ghashuijs landt ende Cornelij Phillipsz. lant of tot anden Broeckwech toe. Ende Claes Gherijtsz. ende Neeltgen, Wouter Gherijtsz. weduwe

mijt Dirck Woutersz. hoer rechte voechts hant gheloveden mijts ghesamender hant voor hemluijden ende hoer erven dit voersz. lant Cornelij Vrerijcksz. vrije te waren als recht is als men vrije lant ende eigghen erf sculdich is te waren in den voersz. ambocht daert ghelegghen is ghelijken buijerlant. Ende of Cornelij Vrericksz. voersz. of zijn erven eenijch ghebreck hijnder moeijenissen of schae hadden ander voersz. warijnghe, dat soudén zij moghen verzién ende verhalen an twijé morghen lants die Claes Gherijtsz. ende Neeltgen mijt Dirck Woutersz. haren voechts hant voersz. setten tot waerborch, ghelegghen unden voersz. ambacht in Ghelderswoude. Belegghen an den oest zijde Dirck Jansz. ende an die west zijde Pieter Jansz. Spijck, streckende van den Broeckwech of tot an Dirck Jansz. landt toe. Ende dese voersz. twijé morghen lants nijet goet ghenoch ende waer, soe soude Cornelij Vrerijcksz. of zijn erven dat voert an (..ken) verhalen an die reeste goeden die Claes Gherijtsz. ende Cornelia Wouter Gherijtsz. weduwe nu ter tijt hebben of vercrijghen moghen, waer an die ghelegghen zijn of bevonden sullén worden in steden of daer buijten. Ende Claes Gherijtsz. voersz. ende Neeltgen Wouter Gherijtsz. weduwe mijt Dirck Woutersz. hoir rechte voechts hant voernt. ghekomen mijts ghesamender hant hijer gheen weer van recht teghen te doen noch doen in eenigher manijeren gheestelijck noch waerlijck noch mijt ghenen nuwen vonden diemen hijer teghens contrarie soude moghen verzién. Ende Claes Gherijtsz. ende Neeltgen mijt horen voecht voersz. gheloveden voer hem ende hueren erven hijer elcx malkandetr vander (....) schadeloes te houden. Ende van dese coope soe belijeden hem Claes Gherijtsz. ende Neeltgen Wouter Gherijtsz. weduwe mijt Dirck Woutersz. hoer voecht voersz. van Cornelis Vrerijcksz. wel voldáén ende betaelt te wesen, den laetsten penninck mijt den eersten. Alle archelist wtghesloten. In een kennijssen der waerheijt soe hebbe ick Cornelis van Zweeten amboechts heer ende scout inder amboecht voersz. desen brieff bezegghelt mijt mijn selfs zeegghel hijer onder an ghehanghen. Daer bij waren als tuijchen Willem Claesz. ende Thijman Arijansz. Int jaer ons heren vijftihien hondert ende vijf ende dertich den achten dach in augusto.

Regest 52 d.d. 29-01-1538.

Ick Cornelis van Zweeten amboechts heer ende schout inden amboecht van Zoeterwoude doe kont ende kenlijck allen luijden dat voer mij quamen Neeltgen, Wouter Gherijtsz. weduwe mijt Dirck Woutersz. hoer rechte voechts handt ende ghelijede ende bekenden dat zij vercoft hebben Cornelij Vrerickx zoon een half morghen lants bijden hoep sonder maet, ghelegghen inden ambocht voersz. in Gelderswoude, belegghen an die noert zijde Mathijs Jansz. mijt meer ander, an dat oest eijnde Machtelt, Pieter Gherijtsz. weduwe, an die zuijtzijde Cornelij Vrerijckx. voersz., die westeijnde Cornelis Phillipsz. Ende Neeltgen, Wouter Gherijtsz. weduwe mijt Dirck Woutersz. voecht voersz. gheloven Cornelis Vrerickx zoon voersz. dat voersz. lant vrije te waren jaer ende dach als recht is ende allen commer of te doen tot nu ter tijt toe, als men vrije lant ende eigghen erf sculdich is te waren ghelijken vrije buijerlant inden amboecht daert ghelegghen is ende Cornelis Vrerijckx. of zijn erven eenich ghebreck hijnder moeijenisse of schade hadde ander voersz. warijngghen, dat soudén zij moghen verzién ende verhalen an een morghen lants ghelegghen inde voersz. amboecht, belegghen in Ghelderswoude an die noert zijde Claes Gherijtsz., dat oest eijnde den Broeckwech ende die zuijtzijde Pieter Jansz. Spijck ende dat westeijnde Dirck Jansz. Ende voert te moghen verhalen an alle die reeste goeden die Neeltgen voersz. nu ter tijt heeft of hijer naemaels sal moghen vercrijghen, gheen goeden wt ghesondert, waer ende waer an die ghelegghen zijn of bevonden soude moghen worden in steden of daer buijten. Ende Neeltgen, Wouter Gherijtsz. weduwe voersz. mijt Dirck Woutersz. hoer rechte voecht voern. ghelove voer haer ende hoeren erven ende naecomelinghe hijer gheen weer van recht teghens te doen noch doen in eenigher manijeren gheestelijck noch waerlijck noch mijt ghenen nuwen vonden die men hijer op teghens contrarie soudén moghen verzién. Ende van desen coepe soe belieden haer Neeltgen Wouters weduwe mijt Dirck Woutersz. als voecht voersz. van Cornelij Vrerijcksz. wel ende duechdelijken voldáén ende betaelt te wesen, den laesten penninck mijtten eersten. Alle argheijst wt ghesondert. In een kennijssé der waerheijt soe hebbe ick Cornelis van Zweeten amboechts heer ende scout inden voersz. amboecht desen brieff bezeegghelt mijt mijn selfs zeegghel hijer onder an ghehanghen. Hier bij an ende over waren als tuijghen Bouwen Korstensz. ende Bruijn Gherijtsz. Int jaer ons heeren vijftihien hondert ende acht ende dertich den neghen ende twijntijchsten dach in januario nae gheméen scrijvens.

Regest 70 d.d. 06-03-1548.

Ic Adriaen Vranckensz. scout inden ambochte van Zoeterwoude due conte dat voer mijn gebuijrens hier onder gescreven, quam ende compereerde Adriaen Dircxz. buijerman inden ambocht voersz. ende bekende voer hem sinen erven ende nakomelingen dat hij aen gestaen heeft van Cornelis Frederijcxz. sekere vijff morgen lants bijden hoep sonder maet gelegen inden ambachte voersz. in Gelderswoude broeck, belent an die noert sijde Cornelis (Andriesz.), an die (suijt)sijde Cornelis Vrederijcxz. voersz. selver, streckende vanden Broeckwech aff tot Gerijt Boeckelsz. lant toe. Welcke erff pacht Adriaen Dircxz. voersz. Cornelis Vrerijcxz. voern. sijne erven ende nakomelingen belooffde

te vrijen ende scadeloes te houden vande voirsz. vijffthien karolus gulden tsiaers. Ende stelt daer onder sekere ses margin lants den hoep sonder maet, gelegen inden ambochte voorsz. in die Weijpoert, belent an die suijsijde Pieter Jansz., an die noert sijde Jan Florijsz. ende Jan Dircxz., streckende van die Weijpoertse vlijedt tot Claes Gerijtsz. lant ende Neeltgen Wouter Gerijtsz. landt toe. Ende voert generalicken ende specijalick an alle die gueden die Adriaen Dircxz. voirn. nu ter tijt heeft ende noch hier namaels vercrijgen soude mogen, waer ende waer an dit gelegen sijn, het sij in steden of daer een buijten nergents wijtgesondert. Des toirconde soe hebbe ick Adriaen Vranckensz. scoudt voirsz. doer begeerte van Adriaen Dircxz. voirsz. desen brijeff wijt hangende bezegelt ende mijn selffs zegel hier onder an gehangen. Anno vijftijen hondert acht en veertich den sesten dach van maert. Daer bij an ende over waren als getuijgen ende buijeren des selfs ambochts als Jacop Jansz. ende Jan Bruijnensz.

Regest 72 d.d. 07-03-1549.

Ic Adriaen Vranckensz. schout inden amboechte van Zoeterwoude doe kondt allen luiden dat voer mij ende die buijren hier naebeschreven quam ende compareerde selver persoonlijck gecomen is Cornelijs Vrerijcxz. ende bekende mits desen vercoft, getransporteert ende ten vrije eijghen overgegeven te hebben Jan Florijsz. zijn zwager vijf schouten beseghelde brieven van Zoeterwoude daer desen brijeff up doersteken getransfixeert ende besegelt is, omme daer mede te connen (winnen) ende te verliesen in allen schijn of het Cornelijs Vrerijcxz. voorsz. selver waere. Ende bekende hem van dese coope all wel voldaan ende betaelt te wesen den laesten penninck mijtten eersten van Jan Florijsz. voorn. Ende ick Cornelijs Vrerijcxz. heeft beloofd ende beloofd mijts desen de selve brieven daer op dese transpoert besegelt is, vrije te waeren jaer ende dach als recht is. Mits daer jaerlijckx up staende vier schilden ende noch twee karolus guldens lossrenten. Ende off dit meer beswaert of belast was boven gene dat voorsz. staet, dat sal Jan Florijsz. voorsz. of zijnen erven mogen versijen ende verhalen an alle die goeden die Cornelijs Vrerijcxz. voorsz. nu ter tijt heeft of hijer namaels verchrijgen sal mogen ende dat int (.)oonnen als orfpenninck. Alle dinck sonder arch ofte list desen toirconden van dese, soe hebbe ic Adriaen Vranckensz. schout voorsz. desen brijeff mijt mijnen zegele hier onder vuythangende besegelt in presentie van Willem Claesz. Wortel ende Jan Heijnricxz. als tuijgen. Int jaer ons heeren duijsent vijfhondert negen ende veertich upten sevenden dach in marcio.

Regest 73 d.d. 05-09-1549.

Ick Adriaen Vranckensz. schout inden ambochte van Zoeterwoude doe kondt allen luiden dat voer mij ende den gebuijren hier naebeschreven gecomen ende compareerde selver persoonlijck gecomen es Jan Florijsz. ende bekende mijts desen vercoft, getransporteert ende ten vrijen eijghen overgegeven te hebben Cornelijs Sijmons. ses schouten besegelde brieven van Zoeterwoude daer desen brijeff up doergesteken getransfixeert ende besegelt is, omme daer mede te wijnnen ende te verliesen in allen schijn of het Jan Florijsz. voorsz. selver waere. Ende bekende hem van dese coope all wel voldaan ende betaelt te wesen den laesten penninck mijtten eersten van Cornelijs Sijmons. voern. Ende ic Jan Florijsz. belove mijts desen de selve brieven daer up dese transpoert besegelt is, vrijs te waeren den tijt dat hijt gehadt heeft. Daer onder stelt Jan Florijsz. vier morgen lans bijden hoop sonder maet ende heeft belegen an die noort zijde die Kerck laen, an die zuijt zijde die erfgenamen van Jacob Haes, an dat west eijnde Pieter Claesz., an dat oest eijnde den Broeck wech. Ende voert te verhaelen an alle die reste goeden die Jan Florijsz. voorsz. nu ter tijt heeft of hier namaels verchrijgen sal mogen. Ende dat te wijnnen als orf penninck. Alle dijnck zonder arch ofte lijst desen toorconde van desen soe hebbe ic Adriaen Vranckensz. schout voorsz. desen brijeff mijt mijnen zegele hier onder vuythanghende besegelt in presentie van Joost Woutersz. ende Claes Jacobsz. als tuijgen. Int jaer ons heeren duijsent vijf hondert neghen ende veertich upten vijfden dach in september.